



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 8

Taoba US tir Donald Trump  
Mongulbarnü aputsü imlar

Indian Wells akokba asayartem rongnung  
Bopanna tambusang kümogo



VOL. XX NO. 157 (ADOK 157) DIMAPUR TENTONÜ (MONDAY) METSÜREMI (MARCH) 20, 2023 ₹ 5.00

## Nagaland nung G20 Summit atema renemogo

**Dimapur, March 19, 2023 (TYO):** April 5, 2023 nü Kohima nung G20 Summit alitsü atema maparen ajak renemogo ta Nagaland Chief Secretary J Alam-i metetdaksü.

"State sorkari summit amongtsü atema maparen ajak renemogo. G20 teshimtet nübotem pelaa agizüksü atema mapa inyakdar" ta Alam-i ashi.

Iba sentong tulu atema tayimtsü anendak, gari lenmangtem aser sentong agitsüba tesemtem yanglushiogo, ta paisa shisem.

"India-i December 2022 nungi tenzüker küm ka atema G20 indang presidency inyaker aser iba ya linük atema konang tulu ka lir. G20 calendar nung küm piyong yimti 33 nung sendentem amentsü renema lir" ta J Alam-isa metetdaksü.

Kohima nung amongtsüba aliba G20 Summit nung teshimtet nübo 110 shi adentsü imlar.

Parnok nisung 100 shi G20 linük 28 nungi asütsü aser tanüngbaji international organizations nungi asütsü, ta paisa ashi.

Iba mapang shishilembabaren indang sendentem aser sobaliba sentongtem agitsü aser idangji Nagaland indang tashi sayutsü ta Alam-isa ashi.

"Sendentemji agriculture & allied services, food processing industry aser tourism nung teimba rangloker amentsü" ta paisa ashi.

April 4, 2023 nü Capital Cultural Hall, Kohima nung sentong ka agitsü aser idangji ainertem pelaa agizüksü aser April 5 nü State Banquet Hall nung shishilembaba sendentem amentsü, ta Nagaland Chief Secretary-isa metetdaksü.

"Nüngtugu Hornbill Festival amongdak Kisama Naga Heritage Village nung sobaliba nikongdang aser dinner ka ayonga agitsü" ta paisa shisem.

## Khalistani telungpur 4 Dibrugarh-i anir aru

**Dibrugarh, March 19, 2023 (Agencies):** Khalistani telungpur tanishir pezü tashi Deobarnü Assam kübok Dibrugarh-i anir aruogo.

Parnok ya special airforce aircraft ka nung anir aru aser Central Jail, Dibrugarh nung puokogo ta osang angazüker.

Inspector General, Prisons dena Punjab Police 27-i Khalistani tanishir pezü ya anir aru.

Mohanbari Airport nung Dibrugarh Deputy Commissioner Biswajit Pegu aser Superintendent of Police Shwetank Mishra nati parnok agizük.

Northeast India nung Dibrugarh central jail ya tepuokdak tejentiba rongnung ka lir. Iba tepuokdak ya kanga junga yanglua lir aser Assam nung ULFA telungpurtem kanga bulua mapa inyakdang Dibrugarh central jail nung parnok puoka ayu.

March 18, 2023 nü Punjab Police-i Pro-Khalistan telungpur telok Waris Punjab De tanishir

Amritpal Singh ya ozüng amertem dang nungi jenshir (fugitive) ka ta sangokja liasü.

Punjab Police-i state ajungalen Waris Punjab De anema mapa tenzüker aser züngsemtem aputsü mita ao.

Punjab Police-i tang tashi nung telungpur 78 puogo aser maneni aputsü bushitepar.

Deobarnü Dibrugarh-i anir arurtemji Daljit Singh Kalsi, Bhagwant Singh, Gurmeet Singh, aser Pradhanmantri Bajeka nung ta osang ajanga ashi.

"Iba ya 'police-to-police cooperation' lir aser Punjab Police-i asüngdangba ama inyaker" ta Assam Chief Minister Himanta Biswa Sarma-isa ashi.

"Taoba mapang Assam nungi Bihar-i tepuokdak ayurtem yokogo aser iba ya police-to-police cooperation lir. Ni iba nung tashitsü kecha mali. Tepuokdak ayurtem ya security maparen atema yangi (Assam) anir aru" ta CM Sarma-isa ashi.

## Mokokchung nung shiremi nisung 1 yirutsü; 1 jentet

**Mokokchung, March 19, 2022 (TYO):** Mokokchung nung Marepkong Ward nung alir Phom nung Nanglai aser par medemer ka March 15 nü arem nung yata ontai aoba shirem ka ajurua Phom nungbaji yirutsü aser medemsangji jenbutet.

Iba tatalokba osang angashia Nanglai Phom'er jabaso den Tir Yimiyim-i jembidang ashiba agi, tebu aser medemsang tena ya anepdang 10 ako meta kidang nungi arem jagi aoba arem tonger lia shiremji aoksa arem nungi adoka angu, shiremji ngua tenapronglaji ajenba mapang nung tebuji shirem jagi menep aser pa dak tenük tachichi teküpok yirutsü aser tekong nung ango.

Ashiba agi tebu dak tekong

nung ngor külenji pai shirem tebang nungji ajep aser jena ao saka ano shiremji tanaben meyipa arunung nok agi khen alep aser iba sülenji shiremji jena oatok.

Iba tatalokba sülenji medemsang jagi kidang osang agütsü aser kidang aliri anir adoka Dr Imkongliba Memorial District Hospital (IMDH), Mokokchung nung khen anepalu aser tang Faith Hospital, Dimapur nung anepaludagi.

Nanglai'er jabaso-isa tangbo komoji kanga tajungba kümdagi aser achiajem shitak chiajemdagi ta ashi.

Yirusang ya arishi küm 60 tain Nanglai Phom aser pa ya Police nung Pension ngur küm 11 buba Marepkong Ward Mokokchung nung telidak lir.

## Tanü nungi 14 buba NLA indang mezüngbuba session tenzüker Tetsür 2 dena mezüng atema MLA inyaker nisung 23-i tezüngzüktep agitsü

**Kohima, March 19, 2023 (TYO):** 14 buba Nagaland Legislative Assembly indang mezüngbuba session Hombar nungi tenzüksü aser March 28, 2023 nü atemtsü.

Iba ya Nagaland nung People's Democratic Alliance (PDA)-2 sorkar indang mezüngbuba session asütsü.

PDA ya election magidang NDPP-BJP teloktep ajanga akümba sorkar lir aser Chief Minister Neiphiu Rio lenistüba kübok parnoki kümsük tanabuba sorkar kümogo.

March 28 tashi session alitsü saka House nungbo anogo pungu dang senden amentsü kechiyong March 22, 25 aser 26 anogotem recess alitsü aser March 27 Deobar asüba agi sodi asütsü.

14 buba Nagaland Assembly

ya opposition medeni tenzüka mezüngbuba House asütsü. NDPP aser BJP dak alia political party 7 den Independent MLA ajak agi parnok 23 liaka parnok ajaki sorkar pusema nungiter.

14 buba Nagaland Assembly nung political party teimtiba lir aser parnokji Nationalist Congress Party (NCP) nungi MLA 7, National People's Party (NPP) nungi 5, Naga People's Front (NPF), Lok Jan Shakti (Ram Vilas) o Republican Party of India (Athawale) nungi anana (2), JD(U) nungi 1 aser Independent 4 lir.

Chief Minister Neiphiu Rio-i Honibarnü non-PDA party tem den senden ka amen aser idangji parnoki sorkar pusema nungitba shiditem agizük ta osang angazüker.

NLA nung züngsem tasentemi asüng Hombar nung pro-tem speaker Mhathung Yanthan tsüngdang tezüngzüktep agitsü.

Züngsem 60 nungi tang mezüng atema MLA inyaker parnok 29 dena lir. MLA tasentem rongnung tetsür MLA ana- Salhoutuonuo Kruse (Western Angami A/C) aser Hekhani Jakhalu (Dimapur-III A/C) na dena lir.

Nagaland Governor La. Ganesan-i Mongulbarnü NLA nung mezüngbuba onük jembitsü aser Brihostibarnü Governor onük atema 'motion of thanks' alitsü.

Chief Minister Rio ya minister in-charge of Finance lir aser pai March 27, 2023 Budget 2023-24 benoktsü.

## NLA Speaker atema Sharingain-i dang nomination file asü

**Dimapur, March 19, 2023 (TYO):** Nagaland Legislative Assembly nung Speaker indang election atema nomination papers agütsüba tatemangba anogo tashi nung nisung kati dang tenüng agütsüogo.

Deobar tashi Nagaland Legislative Assembly Secretariat

nung Speaker atema tenüng agütsürji Sharingain Longkumer dang lir. Pai March 18 nü nomination file asü.

Minister Temjen Imna Along-i Sharingain tenüng benok aser ibaji advisor Kekhrielhoulie Yhome-i pusema nungita liasü.

13 buba Nagaland Legislative Assembly nunga Sharingain-i Speaker inyaka liasü aser taküm assembly election nung pai NDPP ticket amer takok angu.

Nagaland Legislative Assembly nung Speaker indang election ji Hombar (March 20) nü agitsü.

## Modi aser Shah nati Naga yimten tebilemstü atema inyaktsüla: Azo Neinu

**Kohima, March 18, 2023 (TYO):** Prime Minister Narendra Modi aser Union Home Minister Amit Shah na den Naga nung MLA temi küm ka tsüngda Naga yimten latettsüla ta Naga People's Front Legislature Party leader Kuzholuzo Azo Nienu-isa ashi.

Honibarnü osangbener den opposition maliba sorkar akümtsüba indang olen jembidang "sorkar kümsük tatemtsü anasa dang Naga yimten tebilemstü jembiba atema public-i onok (MLAs) kanga lutsüogo" ta Azo-i ashi.

"NPF-i Naga yimten tebilemstü atema inyaka arur aser iba jagi tetenzük nungi iba mapa tenzüksüla ta tangatetba nung onoki sorkar pusema nungitsü lemtet. Onoki Naga yimten tebilemstü tejakleni anir aotsü aser tekaratiba nung iba maparen tembangnür" ta pai ashi.

"Naga yimten khurettem angatetteptsü atema küm kaji teperi. Prime Minister Narendra Modi-i February 24 aser Union Home Minister Amit Shah-i February 21 nü Naga nung khuret ajak koktetsü ta election mapang nangzüko" ta Azo-isa metetdaksü.

"Modi aser Shah nati jembiba ama inyaktsüla aser kasa mapang onok MLA temia yimtenren temlungtetba sayutsüla. Yimtenren temlungtetba lira asenoki küm ka tsüngda nung iba tebilemstü koktetsü" ta paisa shisem.

MLA ajaki yimten latettsü

nendaka bilemra, NPF MLA temi koba mapang südir menden toktsütsü renema lir, ta Azo-isa ashi.

"Onoki sorkar pusemba shidi agütsüogo kechiyong onok teimla maliba minority ka kümogo aser küna (Achumbemo Kikon) kijai opposition ka akümtsü makok" ta pai NPF-i sorkar pusemba indang jangjashitsü.

NCP MLA teneti opposition ka kümogo saka NPF atemabo sorkar nung adenba tajungba. Ajisüaka, sorkar nungi telangzüba kecha mangu lir, ta Azo-isa ashi.

Mezüngbuba Assembly session nung NPF-i tasüngdangba kar renema lir mali ta osangbeneri asüngdang "tan ya mezüngbuba session asüng tasüngdangbatem agütsütsü mapang maliasü" ta Azo-i langzü.

"Tangbo department dang asüngdangyatsüba kanga karara lir, anungji taruba session nung onok sorkar mesüra opposition nung liang tasüngdangba agütsütsü. Onoki nübortem temeten atema jembitsü" ta paisa metetdaksü.

NDPP-BJP sorkari pusemba shidi magizükra NPF-i NDPP mesüra tanga political party tem den loktep tebilemba lir mali ta osangbeneri asüngdang "tanga party den melokteptsü. Onoki Naga yimten tebilemstü atema Chief Minister dang sorkar pusemba shidi zülü aser iba ya

taoba sorkar tangatetba nung liasü. Parnoki magizüra onoki tanga mapa inyaktsü" ta Azo-isa langzü.

ULB election atema jembidang "NPF-i 2017 nung taküm ana samaba, sorkar kiojen aika raksatsüba aser candidate ki amakba lendong ama matalokdaksünür, anungji onoki kanga süoki ia bilemer aser election magidang angatetteptsüla" ta Achumbemo-isa ashi.

Supreme Court-i May 25, 2023 tashi nung ULB elections agitsü anogo züngzüksüba atema "Supreme Court dang nungibo nübortem ola tematiba" ta Azo-i ashi.

"Nisung tepsettsü aser nisung taküm o kiojen atema lendong lira kodaser SC-i tashi amshitsü. SC ya nübortem ola angatsü atema lir anungji ULB election thina atar Act meyipa repringshia yanglushitsüba nung kechi timtem lir?" ta paisa asüngdang.

Nagaland Municipal Act, 2001 ajanga Constitution nung Arla 371(A) nung kongshir asü masü ta osangbeneri asüngdang "Hao 100%". 2017 küm NPF sorkari election agitsü merang saka tamakok angu aser iba jagi onoki tanü sorkar dang nübortem ola angatsü ashir" ta Azo-isa ashi.

Nübortemi melenshitsü ahangba ama Act nung arla kar yanglushir ang ULBs indang election agitsüla, ta paisa shisem.

# UPHC Seikhazou nung angati health camp ayongzük



**Kohima, Metsüremi/March 19 (TYO):** Urban Primary Health Centre (UPHC), Seikhazou, Kohima ajanga Super Market complex, Kohima nung yokya-yokchir atema special outreach Health Camp ka ayongzüka liasü.

Naga Hospital Authority Kohima nungi specialists tem den külemi UPHC, Seikhazou ajanga yokya-yokchir aser dokan kibur nem medical consultation, angati mozü agütsüba, mashisa tetsü aser tanur arishi küm 16

nungi teküpoklen alir nem nem mozü agütsüba, basic laboratory services aser screening amala agüja liasü.

Iba camp nung street vendors 100 dak tema teyari balala agia liasü.

"Onoki jila nung makamaiter, street vendors, migrant labourers aser sen ajema anguba telok nem temolung agütsü," ta Medical Officer in charge of UPHC Seikhazou Dr. Bilva Yalie-i ashi.

Item nisung yagi service tem angati agitettsü aser yangji

registration, mozü aser consultation ajak angati lir, ta lai ashi.

UPHC Seikhazou ya 2014 küm amenok aser 2019 nung National Quality Assurance Standards certificate agütsü aser taoba küm re-certification ngua liasü, ta lai ashi.

Ano March 25 nü Inter-State Bus Terminus (ISBT), Kohima nung ANTA taxi driver tem atema iba amala health camp ayongzüksü, ta Dr. Bilva Yalie-isa metetdaksü.

# Temesepba mozü shibelendang amshiba bike 28 Manipur police-i apu

**Imphal, Metsüremi/March 19 (Agencies):** Manipur sorkari nokdanga aliba Chinese Bikes 28 tashi Manipur police temi arütsü anasa aliba district tem nung ghonda 18 meita aoba mapang apu, ta ketdangsürtemi Deobarnü sangdong ka nung ashi.

Chinese Kenbo bikes tem ya Manipur aser Mizoram nung international Myanmar border len ozüing alema amshir.

China nunger Kenbo frim ajanga yangluba motorcycle ya kanga tepongba aser tesadem lir aser Myanmar nungi nokdanga aliba temesepba mozü shibelendang amshir.

Motorcycle tem ya amshitsü memelar aser ano yangji temesepba mozü bener Myanmar arütsü alema senzür, ta osang ajanga ashir.

Iba dak sendakba nung

Manipur Chief Minister N Biren Singh-i Twitter post ka nung, "Tang tashinung Churhanpur Police temi Kenbo bikes 26 (temesepba mozü shibelener aser poppy lu ayimer temi timba amshir) puogo aser item bike ya Custom Department nem agütsüogo. Tang Kenbo bikes ajunga Langthabal lep Chingning godown nung lir. Kaket kecha mali aser bike ajak ya Myanmar nungi bener aruba," ta ashi.

Churhandpur district ya Manipur south tsütsü lir aser Kamjong district ya Manipur anüdoklen lir.

District anaprong ya Myanmar den arütsüa lir.

CM N. Biren Singh-isa ano tweet ka nung "Myanmar nungi Kenbo bike ana (poppy lu ayimer aser temesepba mozü shibelener temi timba amshir)

Kamjong District Police-i tanü, 18/02/2023 puogo. Ka Kamjong town nung lir aser ka Kasom Khullen tesem nung lir," ta ashi.

Indian Motor Vehicle Act 1988 kübok apuba bike 28 ya Imphal west district kübok Canchipur nung aliba gowdon nung yua lir, ta police temi ashi.

Home Ministry ajanga China nunger gari India-i bener arütsü nokdanga aliba ama state sorkari inyaker, ta osang ajangasa ashi.

Iba amala bike anishiba nisungtem ket nungi Assam Rifles, state excise, narcotics department aser police temi heroin aser methamphetamine amala temesepba mozü jenti pua lir, ta osang ajanga ashir.

Mizoram sorkaria arütsü aliba district tem nung China-i yangluba 125 cc Kenbo motorcycle ya nokdanga lir.



Frontline Ministry ajanga Kubolong Baptist Arogo nung Mother Heart Skool, 16th nungi 19th March 2023 tashi agia liasü. Iba sentong nung MHS Director Rev.Dr. Toshi Langu, tesayur Dr.Bendangyapangla Changkiri aser technical co-ordinator Mr.Sashi Jamir liasü. Parnok ajak agi tetsü 39 Mother Heart Skool nung graduate asü.

# Kohima nung mejangjabanisung tasü mangka ngutet

**Dimapur, Metsüremi/March 19 (TYO):** Mejangjaba tebur (arishi küm 40-50 shi) tasü mangka March 18, 2023 nü T Khel Model Village, Kohima tsünglanglen nguteta liasü.

Iba nisungba ya tar süklep 5.3 aser long pant sentsü tanak ka sema liasü.

Ozüing agi melaba maparen ajak tembangba sülen tasü mang ya jangiatettsü atema North Police Station morgue nung yua lir.

Osang tali metettsü atema North Police Station, Kohima den mobile number 7005986018 ajanga tongteprateptsü metetdaksüogo.

# NSCN/GPRN ajanga sangdonger

**Dimapur, Metsüremi/March 23 (TYO):** Tarutsü nung sangdong magütsü tashi Eyingo Lotha ya March 17, 2023 nü nungi tenzüka Lotha Region indang chairman ama inyaka alitsü, ta Ministry of Kilo

Affairs, NSCN/GPRN sangdong ka ajanga ashi.

Secretary, Kilo Affairs, NSCN/GPRN ajanga totuyuba ka nung Eyingo Lotha dang anogo tenet tsüingta office mapa inyak tenzüksü shia liasü.

# YouTuber Max Naga anema bushisüngdangtsü benok



YouTuber Max Naga

molunga ali-mali metetdaksütsü shia lir.

Pukhai-i pai inyakba bukuma tezüluba nung magütsüra mesüra tsüngtong marura mesüra tetuyuba sülen anidaktsü memolungra, bushisüngdangter temi pa medeni bushisüngdangtsü, ta ashi.

Nagaland Government Servants Conduct Rules, 1968 indang Rule 20 kübok sorkar tenzüker shingaia yimten ken o mejembitsü mesüra jembitsü memerangtsü mesüra sorkar kübok service dak sendakba nung pei tejangraba ajangzüksü nükjidong nung temaba ketdangsür 'influence' asütsü memerangtsü, ta shia aliba Pukhai-i nem iba memorandum ajanga metetdaksü.

Pa tenüing nung dangari kari danga iba ken o atema telangzüba agütsüra, Pukhai-i iba telangzüba meteta lir aser pai meteta inyak ta angatettsü aser Nagaland Government Servants Conduct Rules, 1968 indang Rule 20 nung aibelenba atema tapet mera agütsü, ta ashi.

Pai meshidak mesüra tim masüba inyak ta tai tongloksüba rongnung pa mapa 'proxy' yur dangar nem inyakdaksüba, political party tem den sendaktepba mesüra political mapa inyaksangshiba densema lir.

**Kohima, Metsüremi/March 19 (TYO):** Government High School, Aghunaqa, Niuland nung peon ka ama inyaka Nagaland Government Servants Conduct Rules, 1968 indang temzüng balala nung aibelenba aser tim masüba mapa inyakba atema Department of School Education (DoSE) ajanga YouTube channel 'Common Public Platform' nung Max Naga tenüing amshisang Pukhai anema bushisüngdangtsü onük benoka lir.

DoSE indang principal director ajanga memorandum ka agütsüba nung Pukhai dang anogo ter (10) tsüingta pa bukuma tezüluba agütsütsü aser tsüingtong arua ken o jembitsü

# Election Commission nungi telok kati Assam semdangtsü

**Guwahati, Metsüremi/March 19 (Agencies):** Assam nung delimitation exercise agitsü lia Election Commission of India (ECI) nungi telok kati iba state March 26 nungi 28 tashi semdangtsü.

Iba mapang ECI nungi Chief Election Commissioner Rajiv Kumar aser Election Commissioners ana, Anup Chandra Pandey aser Arun Goel nungeri political party aser civil society densema lokti tentet balala ajurutsü aser jembishinüba sülen Assam nung constituency lemsaba maparen inyaktsü.

"State nung tang tagidak delimitation exercise dak sendakba nung lokti tentet balala aser nüburtemi imlaba angatettsü aser tensa tejangja metettsü mechi Commission-i Assam semdangtsü lemet," ta

sangdong ajanga ashi.

"Iba mapang Commission-i political parties, nisung tejangja, civil society organisation, social service agütsür aser District Election Officers aser Deputy Commissioners densema state administration ketdangsür ajura osang tejangja metettsü," ta ashi.

Commission-i iba maparen nung stakeholder ajungai shilem agidaktsüner aser shisatsü tajung lemsateptsü imlar, anungjidang iba delimitation inyakyim dak sendakba nung osang bendena mapang shidak nung tembangtsü, ta ashi.

Cabinet senden ka nung telemtetba agia Assam sorkari district pezü agien aser danga district tem den lokteptsü, aser anogo ishika lir Election Commission ajanga administrative temelenshi tsütsü tenokdangba agüja liasü.



"Chiyongtsü kümdanga amshitsübaji külem mapa"

NA CHIYONGTSÜ SHSHILEMBAR KA ASÜ ? NÜ KET NUNG FSSAI REGISTRATION /LICENSE SHITAK LIR NA ?

Food Safety and Standard Act, 2006 kübok section 31 nung ashir, " Nisung shinga temelaba license makai chiyongtsü shshilembaba mapa metenzüksü mesüra meinyaktsü."

CHIYONGTSÜ SHSHILEMBARJJI SHIBA ?

Government mesüra private mapa nung nisung shibai item mapatem ya, tajangzük angutsü asoshi asütsüa akok mesüra masütsüa akok, inyakdir -

- 1. Chiyongtsü tapu ajak yanglur, aseper aser aleperitem, rangben ayokertem, lemshirtem aser ayokertem
2. Chiyongtsü dak aketba osettem bendanglen nungi bener arurtem,
3. Chiyongdak hotels, Restaurants, Clubs, Resorts, Office canteen, Caters aser lendang chi chiyongdak
4. Lenmang nung chiyongtsü aser aonsutsü ayokertem ajak,
5. Chiyongtsü nung endoksema achitsü aser ajemtsü ayoker (Wholesalers & Retailers) online ajanga shishir dena.
6. Chiyongtsü abeneritem/ Chiyongtsü tamajung mekümdaktsütsü ayudak ( cold storage) godown
7. Chiyongtsü yangludak ajak ( tanaben sephsia amshirtem dena)
8. SHG pur dena kidang chiyongtsü yanglua ayokertem ajak.

TEMELABA LICENSE MESÜRA REGISTRATION KOMA AGIZÜKTSÜ ?

- FoSCoS portal [https://foscos.fssai.gov.in] nung repringang
Na License mesüra Registration atema temsüa ali mali metetang
Homepage nung user manuals repringang
Homepage nung License link amshiang
Kanga lendong aketba chiyongtsü tapu kar dak alaka license magütsü dang jelia semdangtsü menüngdaker
FSSAI License mesüra Registration agizüker külen, Chiyongtsü dak aketba mapatem ajak FSS Act, Ruules aser Regulation nung aliba ama benshitsu asoshi License aser Checklists nung shia aliba ajak shitak beshsia anidaktsü.
Business inyakertemi yangi teyari agitsü akok - foodsafetynagalandhelpline@gmail.com

FSSAI Registration & License tapu telemsa :

Table with 2 columns: Registration Category, State License Category, Central License category and their corresponding descriptions.

FSS Act, 2006 kübok Section 63 nung shia aliba ama temelaba license melii chiyongtsü yanglur aser ayokertem asoshi temerenshi lir.

Issued in Public Interest by Food Safety Authority, Department of Health and Family Welfare, Govt. of Nagaland.



March 19, 2023 nü Amritsar nung Rapid Action Force sepaitemi Khalistani lenir aser 'Waris Punjab De' nung tongti lenir, Amritpal Singh'er ki anükba noksa nung angur. Police-i anogo ananübuba Amritpal Singh aser pa den inyaksemertem maneni bushidar.

Tanü Japan Ato kilonser, Fumio Kishida-i India semdangtsü

New Delhi, Metsüremi/ March 19 (Agencies): Hombar nungi tenzüka Japan Ato kilonser, Fumio Kishida-i India anogo ananü semdangtsü; iba mapang nungji linük anati Special Strategic & Global Partnership tashi itshitsü atema jembitsü.

Kishida-i Ato kilonser, Narendra Modi den senden amentsü, 41buba Sapru House Lecture on Indo-Pacific nung o jembitsü aser Delhi nung aliba Buddha Jayanti Park semdangtsü.

Tesüiba küm ishika tsünga India aser Japan na tsünga Special Strategic & Global Partnership jenjang kanga junga kümogo. Küm shia linük anati senden amenba den külemi 2+2 Foreign Ministers senden aser Defence Ministers senden mena defence & security, shishilembaba aser investment, S&T, shisaliok, healthcare aser technologies nung amalitepa

inyaktsü atema jembir. Taküm January ita nunga linük anati fighter jet exercise "Veer Guardian" agia liasü aser tang mezüng Japan nung 4buba "Dharma Guardian" army exercise agiogo.

Linük ana tsünga rongsenketzüng tsütsü partnership, investment, industry aser infrastructure terenlok ajungkettsütsü atema linük anati Japan Industrial Townships (JITs) amenokogo. Iba dak alia shishilembaba, investments aser kiojen temeden densema lenla balala atema linük anati Comprehensive Economic Partnership Agreement (CEPA) tezüngzüktep agia lir.

Linük ana tsünga rongsenketzüng densema lenla aika nung amalitepa inyaktsü atema linük anati Memorandums of Cooperation tezüngzüktep aika agia lir.

Congress medenibo opposition front ji tamakoktsü: Jairam Ramesh

New Delhi, Metsüremi/ March 19 (Agencies): BJP anema tokteptsü atema Congress medenibo opposition front ji tamakoktsü, aser 2024 küm Lok Sabha election atema teloktep yanglura iba nungji party-i tongti shilem agitsü, ta Congress lenir, Jairam Ramesh-i metetdaksü.

Interview ka nung jembidang Ramesh-i, tang iba amaji jembitsü kanga kerar, kechiyong tang atemabo Congress atema tongtibangtibaji Karnataka assembly election densema taküm state balala nung agitsü aliba assembly elections lir, ta metetdaksü.

West Bengal Chief Minister aser TMC tongti lenir, Mamata Banerjee aser Uttar Pradesh

nung Akhilesh Yadav-i aniba Samajwadi Party (SP) natibo parnoki Congress aser BJP naprongla nungi pilaa alitsü, ta shiogo. Party ana yagi Lok Sabha election atema tanga regional party tem den teloktep yanglutsüa akok.

TMC aser SP ajanga opposition telongjem raksatsütsü asü?, ta asüngdangba langzüdang Ramesh-i, "TMC aser Samajwadi lenirtem ajuruteper, Third Front aser Fourth Front maneni tentettsüa akok, ajisüaka Opposition nungji Congress alitsü nüngdak," ta ashi.

"Opposition teloktep yanglura iba nungji Congress-i tongti shilem ka agitsü.

Congress medenibo front ka tentettsüji tamakoktsü, ajisüaka iba atemaji jembitsü kanga kerar," ta pai ashi.

Karnataka nung tama election agitsü, iba sülen Telangana, Madhya Pradesh, Chhattisgarh, Rajasthan aser Mizoram state tem nunga election agitsü, ta pai ashi.

"Takümbo state elections nung onok kanga mazüngi alitsü, anungji 2024 küm general elections atemaji khen lir ang jembitsü," ta taoba mapang Union minister-i ashi.

"Ozü (party) Tir, Mallikarjun Kharge den lenir taintemi 2024 küm election atema asalentong renemtsü aser tanga party tem den jembitsü," ta paisa metetdaksü.



New Delhi, March 19, 2023: Amongnü Delhi police-i Congress lenir, Rahul Gandhi dang asüngdangyatsü atema par kidangi aoba anema Congress pusemertemi longkak aitdang police-i apuba noksa nung angur. 'Bharat Jodo Yatra' mapang nung Rahul Gandhi-i jembiba o ka atema police-i pa nem notice agüja liasü.

Tanü aluyimertem lakh aikati Delhi nung longkak aittsü: SKM

New Delhi, March 19 (Agencies): Aluyimertem union balalai tentetba, Samyukt Kisan Morcha (SKM)-i, Hombarnü Ramlila Maidan nung aluyimertem lokti senden nung adentsü atema linük tesem balala nungi aluyimer lakh aika Delhi-i odar, ta metetdaksü.

Sorkar dang minimum support price (MSP) akhangtsü nükjidong nung 'kisan mahapanchayat' ya ayongzük, ta SKM-i metetdaksü.

Amongnü New Delhi nung osangbenertem den jembidang SKM lenir, Darshan Pal-i, "Centre sorkari 2021 küm December 9 nü tezüluba nung onok dang nangzükba ama shidak inyaktsüla aser aluyimertemi ajangshiba khuret balala pungbatsütsü atema mera agia inyaktsüla," ta ashi.

SKM-i küm ka jungnüa sorkari agizükba ozüng tasen asem anema longkak aita aruba sülen tesüabo sorkari item ozüng asempronglaji agientsüa aküm.

Sorkari aluyimertem nem MSP agütsütsü, aluyimertem anema benoka aliba ken o ajak agientsü aser aluyimertemi akhangba ajak ataloktsütsü, ta nangzükba sülen ang December 2021 nung aluyimertemi longkak aitba anena liasü.

SKM-isa aluyimertem dang Centre sorkari tentetba MSP

committee anentsüla, kechiyong ibaji aluyimertemi akhangba den meputep, ta metetdaksüogo.

Kasa sentong nung aluyimertemi 2021 küm longkak aitba mapang asür aluyimertem nem akhüm agütsütsü. SKM-i ashiba agi, aluyimertemi küm ka piyong longkak aitba mapang nung aluyimer 740 süogo.

Aluyimertemisa pension akhangba den külemi loan sentsüh atoktsü, longkak aitba mapang asür aluyimer kibongtem nem senotsü teyari agütsütsü, Uttar Pradesh kübok Lakhimpur Kheri nung rara adokba ken o nung Union Minister of State for Home, Ajay Mishra minister menden nungi anentsütsü aser Electricity Bill agientsü akhanger.

"JPC (Joint Parliamentary Committee) nem agütsüba Electricity Amendment Bill, 2022 ya agienadoktsüla. Centre sorkari, iba bill atema aluyimertem den jembiba sülen ang bill ji Parliament nung benoktsü, ta onok dang tezüluba nung nangzükba liasü, saka parnoki bill ji benok," ta SKM-i metetdaksü.

Aluyimertemisa, aluyimba nung amshiba light bill angati asütsüla aser yimsüngtem nung aliba kibong shia nem ita shia light unit 300 angati agütsütsüla, ta akhanger.



## TIR YIMYIM YIMOBILEM (EDITORIAL)

DIMAPUR TENTONÜ, METSÜREMI (MARCH) 20, 2022

### Temelenshiba Nagaland

**T**anü anogo ya Nagaland asoshi tatalokba kaji, Nagaland state kümer 14 buba tatar senden kümer mezüing senden tenzüker. Iba jagi Nagaland-a India state kübok tain kümogo ta angatetter. Atangji, linük temzüing nung aliba ama election ka agili, takoker teloki government kümli ta asüba temelenshi yabo yimten nung yimya ka dang, anungji government melenba kisüing agibo nübortem libaliro jenjang tajungba küma memelenshitetsü. Aji oda, Nagaland state kümer taoba government 13 ben tashi melentepa arudang, Nagaland melenshiba jenjang asadanga reprangdangra kangasa melenshiogo. Ajisüaka, tesasatsü kaji, tanü Nagaland melenshibaji tajungba melenshia aoba mapatem dang nungibo tamajungba melenshia aoba mapa aser jaklatem teimba angur. Nagaland state akümdang, Nagaland nung gari lenmang sadema mali asü, electric tesangwa agia Naga lima metongi liasü. Tesem anasemka dak alaka Nagaland nung mozü ki aser school mali asü, anungji Nagaland kümli aritepa gari lenmang tuyonga oa, yimtsüing ajak nung school lapoka schook ki yanglutsü, tesem tesem nung government mozü ki lapoka mozü ki yangluyonga ao aser yimtsüingtem tashi nung electric tesangwa agi tongtsü. Item terenloktem ajanga bener arutsüba temelenshiji tetsüing agi tokolak nung khu taret bener jajaya aliba Naga nungertem to gari nung senzütsü tenzüker, teka ajak apuzüka semki nung tsük sena aliba to tsük asenba kol bener arua tsük asentsü tenzüker, kerosene atsükba lantern milen, kümbok milen aser itaya nung kaket zünga alibato electric tesangwa nung azüingtsü tenzüker. Aji oda, kibong nung anarongdena tanur aika rongnungi ka dang bendangleni tazüing yoka aliba to, yimtak school lapok nungji kibong nung tasoba temang kaketshidaki ao. Tanga tashidak agi shirangbajibo yutsür, tebok oa temang nung timtem ajuru nunga dena aji soittsü tayari bushidak mozü ki maka timtema asü-ama takoksa ajuruba timtem aika pei alidak mozü ki lapokyonga aoba agi koka adok. Iba jagi meteta aser memeteti taküm aika kümzüker aser nisung aika tashitemeteter aküm. Tanü Naga nunger Nagaland nung taküm alirtem ya item mezüing temoatsü agi kongshirtem aser parnok chirnur aser semchirseemnurtem lir. Ajisüaka, tanü asenok aliba Nagaland jenjang ya reprangdangra, Nagaland kümli mezüing gari lenmang yangluba aser apu atemba to meyaglütet kangshiba tesem aika lir. Nagaland kümli mezüing school aser mozü kitem yanglua toktsüba to meyanglushitet tesem aika nung tejjereper lir aser school ki agi school ki memesük tazüing mali aser mozü ki agi mozü ki memesük inyakertema mali, anungji taneptsü bushia arurtema mali ta Nagaland kanga mejungi melenshia aoba angur. Aji oda, Nagaland kümlioba mapa inyaker meinyakma liasüba to tanübo government-i mapa magütsütet kümogo. Itemji kodang bilemdangdir, Nagaland kümli nungi tang pangben rongdak nungdak kar inyakba dak alaka teti Nagaland ronsenren nung junga alitsü aser loktiliba sünepa alitsü asoshiibo sentong tajung ka bener arua tenzüker tatem küma inyakba mangur. Aji oda, aiben Nagaland nung alirtem asoshiibo election agibaji alima tetenzük aser tatembang ama bilema, election nung dang temulung agütsüba dak alaka, election temer government-i teti atema nübortem asoshi kechi inyaktsür ta asübaji shingaia süoki ia mebiler. Iba jagi tanü tashi tangar dang nungi light alia agir aser tangalen kaketshisatsü aser taneptsü bushilen meshimetsür küma jajar. Item tensa tia ya tang 14 buba Nagaland tatar senden nungbo kanga süoki ia jembitsü imlar. Tatar senden züingsem akümtsü atema sen paikato endoka, lendong patekato tizükteta aser tamajung paikato agia tokteper akokba to, tatar senden nung Nagaland ajungtsü atema ola ka danga madoktetra aser Nagaland ajungtsü atema shisa tasen tilaka ka danga magütsütetra aser mapa tila kati danga Nagaland tajungba küma melenshi metenzüktetra, nübortem akoksadakja election-i maiang tajungba süla ta nübortemi züingshitsü. Atangji, item ajakji seret odanga, tang 14 buba Nagaland tatar senden nungibo Temelenshiba Nagaland tajung ka asoshi tatar ajaki pei dang nungibo Nagaland temeimba meima jembitsü aser inyaktsü imlaa atar.

## OLEMSABANG

### YIMSÜSÜBA MENDENJI TSÜNGREMI SHIMTETBA ASER TEMESHI LIR

~ L. Kika Pongener.

*(Yashi adok nungi...)*

Ajioda, yimsüsür shirnoki sempet aser supokrem akhanger, Tsüingremi parnokji sempar aser kopi meli-i atsüingdoklanglang. Tsüingremi Saul chuba kümdaktsüba asoshi sasasetta aser jashia bilem. Naga nunger Yimsüsür tajungtem... Tsüingremi na yimsüsür kümdaktsüba asoshi mejashitsüsa aser mesasatsüsa na alitsü kanga tongtipang lir. Tsüingremi Samuel ainkar dang yamai ashi, "Ni Saul chuba kümdaktsüba atema ni temulung meyipar" (1 Sam-15:11). Yimsüsürtem, na nübur madak yimsüsür kümdaktsübaji ne dak tashi akaba, ne tashitemetet aser na rongsen tulu akabayong kümdaktsüba masü, saka nutsüing nübur maongka nung Tsüingremi na shimtet. Anungji na chuba kümdaktsüba atema Tsüingrem jashia temulong memeyiptsüsa na alitsüla. Kechi atema Saul chuba dang Tsüingrem ain adok ? Saul chubai Tsüingremi ashiba manga aser rongsen Hon, Taribi, San, Nashi pongchi temo aketba item nungji tenuk yok. Saul chubai rongsen nung tenuk yok aser Tsüingremi ashiba mangai Tsüingrem anema inyak. Anungji Tsüingremi Saul chuba sentok aser chuba menden nungi agien.

Tanü-a yimsüsür shirnoki rongsen nung tenuk yoker, senyong ochi yoka achir, supokrem agi kodaktsür, item yimsüsürtemji Tsüingremi sentoktsü. Tsüingremi nübur madak yimsü asütsü atema yimsüsürtemji shimtet, saka yimsüsürtemi parnok nem nungloktsüba ama shitak meinyakra, Tsüingremi parnoka Saul chuba ama merenshitsü. "Kechiyong yimsüsürtem mapa tajung inyakra tetsübutsü maka; saka mapa tamajung inyakra tetsübutsü lir" (Rom-13:3). Yimsüsür shirnoki Tsüingremi pa/la teküpokba jenjang nungi chuba menden tashi ajungketa ta mangateti asüküma/mezümeküma Tsüingrem metsübui yimsü asür, parnokji alar jenjangi anizüktsü koka lir. Ajisüaka, shirnoki Tsüingrem tsübua pai mulongba ama yimsü asür parnokjibo ajungketsü. Tsüingrem o-i ashir, "Ni alartem kor nung sanger angu, aser chubatem alar ama ali nung jajaa angu" (Sayu-10:7-8). Yimsüsürtem na tanü aliba jenjang nung ya masü teküpoktiba jenjang ka nungi Tsüingremi asa-a iba maongka ya moatsü asütsüa shibai metet. Alima putu melentepba ama tensa mapang balala nung yimsüsüba bangdak mendenji-a kari khen, kari khen ta melentepa abentsüsa Tsüingremi ketdang asür, anungji teti aseni tang yimsü asütsü masüji asen ataba mapang nung Tsüingremi mulongba ama ajemalua tila kümer nübur ola anga-a, nübur taginuba angateta aser alima meima yimsü asür asütsüla. Ajioda mesura ashiko, Tsüingremi na tang mena aliba chuba menden nungjagi ano tanaben akhi jenjangi anir alutsü Tsüingrem dak tashi lir. "Temeshipur arendang nüburtem pelar; Saka temenen nisungi yimsü asüadang nüburtem asüktemer" (A. Shin-29:2). Ajioda, yimsüsür tajungi yimsü asüadang nüburtem pelateper; Saka kodang temenen nisungi yimsü asür nüburtem ola adoka asüktema nungnungteper. Yimsüsürtem... Nenok yimsüsüba mapang nüburtem asüktema mejepdaktsütsü kanga kümdangtsüla... Ajioda mesura Tsüingremi ne yimsüsüba bangdak mendenji laodaktsütsü.

Anungji yimsüsür ta angateta, ajemalua tila kümer, Tsüingrem tsübua, nübur ola anga-a, nübur taginuba meteta, ochi shia yimsü asütsüla, kechiyong na amenba mendenji Temeshi aser Tsüingremi shimtetba lir. Anungji iba menden nung amentsü atema tamasa ne dak keta aliba shisatsü tamajung, memeshi, memeruk ochimashi mapatem semzüka indoktsüla. Tsüingremi asen Naga nunger yimsüsür ajak moajangma.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazüingeri angateta agitsü mepishir**

# Tening Namsan Baptist Arogo nung pastor tasen meshitet



March 19, 2023 nü Tening Village Baptist Church pastor, Rev. Ramriwang-i Tening Namsan Baptist Branch Arogo nung Pastor tasenba, Thunbuibo Newmai moaja sarasademtsü dang tangokba noksa nung angur.

**Tening, March 19 (TYO):** March 19, 2023 nü Peren district kübok Tening Namsan Baptist Branch Arogo nung Pastor tasen, Thunbuibo Newmai meshitetba sentong ayongzüka agiogo, ta Rutmakbo Media Cell LBA Mission Center Tening sangdong ajanga metetdaksü.


nung pastor, Rev. Ramriwang-i ketdangsüa iba sentong agi. Iba sentong nung jembidang Rev. Ramriwang-i Pastor tasenba, Thunbuibo Newmai dang Arogo nung züngsemtem tanela chiyungtsü agi mesütsü, len anitsü aser pei khuret angateta Tsüngrem tenzüksü ayongzüik.

Newmai-ia pa nem nungloksüba khuret angateta inyaksü, Arogo tanela nung aintsü aser züngsemtem tanela chiyungtsü agi mesütsü nangzük.

Rev. Ramriwang-isa Deacon tasen Muatubo, senyur Kaidinglung aser caretaker Daungambo nunger atema sarasademja liasü.

Tening Village Baptist Arogo

# Missionary John Allen Chau-i pa masü dang züluba shidi ka ngutetogo



Missionary John Allen Chau

**March 19, 2023:** 2018 küm missionary, John Allen Chau-i Indian Ocean nung aliba North Sentinel Island nung alirtem Khristan yimsü dangi meyipdaksütsü atema iba asetkong semdanga liasü, ajisüaka yangji alirtemi lasang agi pa khaset.

pa khaset. Tamalen-a iba asetkong nung alirtem jagi tzüküm tonga arur nisung tasen aika khasetogo. Tesüiba küm meyirjang aika iba asetkong nung alirtem jagi meimchirtem den tongtepratep kecha mesüi parnok kija alir.

yimli amenoktsü atema ni iba asetkongi aoer. Ni asüyonga yangji alirtem nem tai tetongloksü."

Paisa, "Nenoki ni sowar, ta bilemstüa akok, ajisüaka item nisungtem dang Yisu indang lemsateptsü dalang, ta ni bilemer. Ni tepsetyonga parnok dang mesüra Tsüngrem dang tejashi. Ajisüaka Tsüngrem tajaba tashi anga nenok taküm liang. Asenok ano tanaben ajuruteptsü. Item tribal nisungtem tatembang maka taküm ajangzüksüti tongtibang. Jungkai Adok 7:9-10 nung shia aliba ama Tsüngrem Chuba menden longbanga parnoki pei oshi agi külemba repringtsü ni matateter," ta zülua liasü.

2018 küm November 16 nü angopurtemi pa rong nung meinokja pa iba asetkongji tonga oa liasü. Pa asübaji shingaia tenük agibo mangu, ajisüaka asetkong nung alirtemi tzüyimkümlen tasü mang ka arembaji angopur kati ngua liasü. Anogo ishika lir angopurtemi pa temangji abeni aoba sülen ang tasü mangji jangjaa liasü.

Pa asetkongji tonga maodang pai par kinüngertem dangi züluba shidi ka pai angopurtem ket nungji yuja liasü.

Paibo asetkong nung alirtem jagi pa pelaa agizüksü ta bilem, ajisüaka pa asetkong tonga aoba mapang nung parnoki lasang agi

Shidi nungji pai yamai zülua liasü, "Iba asetkong nung Yisu

# ANO GO ABEN TSÜNGREM DEN

## Nisung Yimya Lipok 1: 24-31

Atangji alima nung aliba shiruru dang nungi meimchirji balaka asü ? Shiruru lima nung meimchir indang shisadangtsübaji kuli aika lir. Tanga shiruru ama pa asor, tangu sashir, achir, mejanger aser asür.

Kechi nung balaka ? Khristan theologyji nisungji Tsüngrem mesüka yanglu ta ashir (Lipok 1:27). Shiruru yamaji masü. Teyangluba nung nisungji balaka yanglu ta sangdongbaji asenoki metettsü tenüngdaksü. Pa Tsüngrem dang nungi teküpbokba kechiaser pa Tsüngremi yanglu, pa shiruru dang nungi temaba kechiaser pa Tsüngrem mesükba nung yanglu.

Atangji asenok tetsübuttsü ka aser tesüngmangtsü ka yanglu (T.Ken 139:14). Itemi shisadangang: Laishibai ashir, asenok shiruru dang nungi temaba. Süra kechiba aikati akhüm dang nungi teküpbokba nung shiruru jakla ama alir aser inyaker ? Meimchir libaliro ajak nung asenoki shibai asenok Pa mesükba nung yanglu, Pa ama alitsü merangtsüla.

Sarasadem : Ne tashikang akhüm kübok ni miimang ; tenükjang ama ni kümzükang.

T.Ken 17:9.

Tenangzükba: Kechiyong shibai nenok dak kongshir Pai pei nükjang nung kongshir.

# US nunger missionary Pilot den volunteers ana jail nungi chiokogo



Missionary Ryan Koher aser kinüngtsü Annabelle den jabaso ana noksa nung angur.

**March 19, 2023:** US nung amenoka aliba ministry Mission Aviation Fellowship (MAF) nungi missionary pilot, Ryan Koher aser MAF kübok South Africa nunger volunteers ana Mozambique nung aliba jail nungi chiokogo, ta MAF-i metetdaksü.

kibong atema sarasademtsür ajak dang pelar. Ryan anema benokba ken o ajak agientsü atema maneni sarasademtsütsü mepishir," ta metetdaksü.

Par asem ya tesüiba ita pezü tashi high-security jail ka nung puoka liasü aser Mongolbarnü par asemprong chiokogo. Parnok chiokyonga iba linük nungi aienshitsu memelar, kechiyong parnok anema ken o maneni angadangdar, ta MAF-i metetdaksü.

"MAF-i Mozambique nung aliba courts dang pelar. Mozambique nung court inyakyim akhümtsübu MAF-i iba dak tali kecha melemsateptsü," ta MAF-isa metetdaksü.

Koher-i, pa junga dang lir aser pa chiokba sülen pai kinüngtsü, Annabel den jabaso ana den aiben jembigo, ta metetdaksü.

Tan ita tetenzüklen MAF nung inyakerteri US nunger missionary pilot Ryan Koher aser South Africa nunger melungtet telok nung inyaker ana tekaraba nung chioktsü atema sarasademjang, ta ayongzüka liasü.

Yaküm December ita nung missionary Koher-i Cabo Delgado Province nung Arogoi lapokba orphanages atema tayimtsü ajanga vitamins den dang supplies bener otsütsü lia Mozambique nung ketdangsertemi pa apu.

Tesüiba küm pongu tashi Mozambique linüki Cabo Delgado province nung Islamic kiralongrarterem anema rarar. Iba rara ajanga nisung million 1 dak tema jenshiogo aser nisung 4,000 dak tema süogo.

Airport nung mita repringba mapang nung Ambassador Aviation Ltd. (AAL) indang mozü aser supplies apu. AAL ya MAF indang partner ka lir.

Ryan Koher apuba sülen pa kinüngtsü Annabelle den jabaso anabo US-i anir oa tang Idaho nung aliba Mission Aviation Fellowship indang headquarters nung lir.

MAF-i parnok indang website ajanga, "MAF-US executive team-i Ryan aser par

MAF-i sarasadem inzü ayongzükba sülen linük 25 nung staff 1,500 dak temai ghonda 24 shia melentepa missionary atema maneni lumia sarasademja aruogo.

**AO OSHI ANGAZÜKDAK:**

**TANÜ ANGAZÜKTSÜBA OJANG**



**Perep**

(v) tapok padaktsü, sü longdena kürakdaktsü (bore, drill, twist)

\* Yin taju kati süng nung tapok ka perepbok.

\* Lai sü nung tzü aliba perepdoker apu.

**Peri**

(v) agishi, nüngdak ajak angu (suffice)

\* Kiburi mapa inyaker nem chiyongtsü peria agütsü.

**OLONG PAITEP # 6461**

15x15 crossword grid with numbers 1-16 indicating starting positions for words.

**TIPLÉN**

- 2. Auo nung chiyongtsü asenba
5. Mangyimba mapang
7. O tamendakdak
8. Pei dak malangka
10. Juli
12. Sen ayudak
14. Tenük agi ajitet
15. Tamajung aküm
16. Apuso

**LANGTSÜNGLEN**

- 1. Lenmang
2. Aor kidong ka tenüng
3. Tenarong maten
4. A \_ \_ \_ g
6. Mopung apodoka
9. Tongtipang tagitsü
10. Menungra bilem
11. Aiür
13. S \_ \_ \_ k
14. T \_ \_ \_ r

**OLONG PAITEP # 6460 TELANGZÜBA**

**TIPLÉN :**

- 1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem,
15. Tambu, 16. Khuret,
17. Sang.

**LANGTSÜNGLEN :**

- 1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok,
12. Amang, 14. Jala.



**TAXI DRIVER KA ASÜKÜM O**

**JEMBIA GARI ANIR :**

Taxi driver : Kü mapa ya sa tajungba, ni kü indang boss, ni koloni onür oteter, shingaiia küdang kecha meshiteter.

Passenger : Right Leni metre 50 or left lenji gate anasaji anenang aser ni maru tashi mokorai ataa liang no.

Taxi driver : Ok boss!

Lilir : WhatsApp



**TENÜNG**

- : ODIBEN
KÜM : 7
Anogo : 20th March
Talidak : Old Showuba
Happy birthday BENBEN

Tsüngremi BENBEN arishi talang den taküm temoatsü aser takok nung len aniangma.

- Odi Anoker, Oya Tutu, Oja & Oba



**Anogo 5 nü Meghalaya International Film festival temogo**



**Shillong, March 19, 2023**

(Agencies): Honibarnü anogo pungunü Meghalaya International Film Festival tembanogo.

Iba benjung ya MeFilma founder president Commander Shangpliang aser Meghalaya Tourism lenisüba kübok Meghalaya Filmmakers' Association (MeFilma) ajanga ayongzük.

Anogo pungunü benjung nung film tejentem sayu aser linük nung film wadang nung shilem agia arurtem aika aden.

March 14 nü iba benjung tenzük aser film sapurtem asoshi film tajungtiba sayua liasü.

Benjung tembangba anogo nung "Ka Synjuk Ri ki Laiphew Syiem (The Alliance of 30 Kings)" ta ser Khasi film

mezüngbuba sayua liasü.

Ano, film sapurtem jangratemdakja nüngtugu Vietnamese film "Kieu" sayu aser Meghalaya International Film Festival tayongertemi "Kieu" Director Cao Thai Ha den film nung shilem agirtem kanga pelashishia agizüka liasü.

Iba benjung nung 'Lorni', 'Ka Chith', 'ING 156', '14', 'Kagaz ki Khasit', 'Anur', 'A Common Crime', 'Joon' film tem sayua liasü.

Benjung tembangba anogo nungsa "Changing narratives with women empowerment and strong female character" ta ser workshop ka agi aser iba nung female entrepreneurs-i Aruna Chakravorty, Anjali Patil aser Barkha Bisht Sengupta nungeri shilem agi aser Aditriye Dipika-i

ketdangsüa agi.

Benjungmong tembangba sentong nung Information and Public Relations Minister Dr. M. Ampareen Lyngdoh-i tongti tesemdanger ama shilem agi.

Iba sentong ya U Soso Tham auditorium nung agi aser Bollywood actor Sanjay Mishra-i tetushi tejaoker ka ama aden.

"Iba ya maongka aika aliba tetenzükba ka lir. Küm 10 tsüngda iba ya linük nung film festivals tajungtem rongnung ka asütsü imlar" ta actor Sanjay Mishra-i ashi.

"State nung sempet aketerem nem maongkatem agütsütsü ta Meghalaya sorkar tenüng nung ni ashir. Onoki ibala mesükba benjung ayongzük nem teyari tulu agütsütsü" ta Minister Ampareen Lyngdoh-isa metetdaktsü.

**Manipur Police-i gari auyar tetsüdi ka apu; Bolero gari ka ngutet**

**Imphal, March 19, 2023**

(Agencies): Manipur Police-i gari auyar tetsüdi ka apuba osang metetdaktsüogo. Pa ket nung auyaba Bolero ka ngutet ta parnoki ashi.

Osang tejangja ka angazükba sülen Imphal West district police aser Kangpoli police külem telok kati Kangpokpi district nung gari auyar telok ka atsüka alidak mita ao.

Iba mapang police-i Sugil Veng ward number 15 nung Letkholeit Khongsai (29) apu. Imphal West District kübok Patsoi nung two-wheeler ka auyaba atema pa ya aputsü bushitepa aru.

Iba mapang police-i Bolero gari temesüng ka apu. Letkholeit Khongsai-i state kübok tesem balala nung gari auyar den tesentaktep liasü.

Senapati district nung gari

ayuar nisung ana apuba sülen police-i ano gari auyar apu.

Police-i taoba hopta ka tsüngda gari auyar ajak agi nisung 5 puogo.

Yairipok Laimanai nung pa ket nung auyaba Royal Enfield Bullet ka bona lia apu.

Iba sülen Brihostibarnü Khangabok tesem nung police-i mita aodang gari auyar ka apu saka pa indang maitsü ano memetetdaktsü lir.

**Assam tsür Krishangee-i 'Miss Queen of World 2023' takok angu**



**Guwahati, March 19, 2023**

(Agencies): Assam tsür Krishangee Gauree-i "Miss Queen of the World" takok korang nguogo aser la ya India nungi mezüngbuba iba takok angula lir.

"Queen of the World" tetoktepba ya March 13 nungi March 18, 2023 tashi New

Jersey, USA nung ayongzüka among.

Iba tetoktepba nung alima tesem balala aser USA nungi tetsür 30-i toktep. Parnoki Miss Queen of the World, Ms. Queen of the World, Mrs Queen of the World takok korang pezü atema toktepa liasü.

Alima tesem balala nung sempet aketba tetsürtem bushitepa aruba sülen tatem nung USA nung "Queen of the World" tetoktepba agia liasü.

Krishangee-i la tobur, tekolok techira aser wainshin metetba ajanga tetendangertem aser tesentepertem atsür aru. Lai Masters in Science and Business Analytics renemogo aser tang GlobalFoundries nung Corporate Strategy team nung mapa inyaker.

"Iba ya pungmang asangsang nung atalokba lir. Ni 'Miss Queen of the World' takok korang anguba ano mamangteter. Ni iba takok anguba atema tebangi meshitetba pelar. Ni kütsü aser kübo, tesayurtem aser ni pusemertem ajak dang pelar" ta Krishangee-i ashi.

Assam nung tobur ajungba toktepba nung international title angur mezüngbubaji Krishangee Gauri lir.

Team India ya National Director Urmimala Boruah lenisüba kübok aden aser la ya Assamese tsür ka lir.



# OFFICE OF THE LANGPANGKONG KAKETSHIR MUNGDANG

*Langpangkong Students' Conference*

H.Q. Chuchuyimlang – 798614. Dist. Mokokchung : Nagaland

Ref. No. LKM/GS/Fel-02/2023

Date: 18/03/2023

## TENÜNGSANG AGÜTSÜR

- 1. Shri P. Bashangmongba Chang (Yaongyimti) BJP  
53 Tuensang Sadar-I A/C
- 2. Shri Tongpang Ozüküm (Mongsenyimti) NDPP  
24 Angetyongpang A/C
- 3. Shri Nuklutoshi Longkumer (Chuchuyimlang) NPP  
22 Arkakong A/C
- 4. Shri A. Pangjung Jamir (Asangma) BJP  
21 Tuli A/C



Langpangkong Kaketshir Mungdang Mendenti ajanga Langpangkong Tsükong nungi nübo tajung tetemsü Lenir **Shri P. Bashangmongba Chang, Shri Tongpang Ozüküm, Shri Nuklutoshi Longkumer aser Shri A. Pangjung Jamir 14th NLA Election** nung shimteta asoshi LKM ajanga Tenüngsang agütsür.

Hon'ble Chief Minister Nagaland Shri Nephui Rio-i parnok dak sempet tajung ajiteta, temolung lemteta Shri P. Bashangmongba Chang, **Minister Housing & Mechanical Engineering**, Shri Tongpang Ozüküm, **Advisor Water Resources**, Shri A. Pangjung Jamir, **Advisor Fishery & Aquatic Resources** menden lezmüksüba aser Shri Nuklutoshi Longkumer **NPP Legislature Party Leader Nagaland State** ka ama **National People's Party Shri Conrad K Sangma**-i temolung lemteta shimba asoshi LKM-i kanga pelaba lemsateper.

Maneni Tsükongsanger ajak dang yimlaba ama Election nung timtem kecha mali tajungtiba nung tembanga aser tetemjen lenir shim nung kanga pelaba sangdonger.

Tsüngremi lenirtem taküm, shisatsü aser anema aliba asen nübertem asoshi moajangma ta LKM sarasadem.

Sd/-  
**IMLINOK**  
President LKM

Sd/-  
**MEYITONGPANG**  
General Secretary LKM

## TENÜNGSANG AGÜTSÜR



Longsa Baptist Arogo nungi adokba Laishir Rev. Longrimongla Jamir, Mangkolemba Baptist Arogo nung Associoate Pastor Women mapa nung 2003-2023 tashi taküm rangben bendanga tenzüka ajanga Reverend jenjang nguteta nübertem nem tenüng tajung bener arutsüba asoshi Longsa Baptist Arogo aser Longsa Laishir Telungjem sabang ajanga la nem tenüngsang aser tetushi agütsür.

Iba den Mangkolemba Baptist Arogo aser ABAM Ordination Council ajanga la tenzüka wadang aser mapa agi temulung süa ordained sütsüba asoshi mulungnena pelaba lemsateper. Tsüngremi tenzüka taküm Khristar Arogo tenzüka wadang nung maneni takokleni aniangma.

**Rev. SÜpongchiten**  
Pastor,  
Longsa Baptist Arogo

**Rev. Mokoktoshi**  
President,  
Longsa Laishir Telungjem

## Taoba US tir Donald Trump Mongulbarnü aputsü imlar

**Washington, Metsüremi/ March 19 (Agencies):** United States indang taoba tir Donald Trump-i pa Mongulbarnü aputsü imlar ta ashi aser pa busemer dang longkak aittsü ajungshi.

Ajisüaka pa indang okatsür temibo police nungi osang kecha agüja mali aser taoba tir indang post ya media osang nung ajemdaker lir, ta ashi.

Prosecutor temi Trump-i mapa tamajung inyakba tai tongloktsütsü lenmang bushir. Ibaji taruba hopta ataloktsü akok, ta osang ajanga ashir.

Pa anema ken o benokra, taoba US tir anema ken o benokba mezüngbuba alitsü.

Iba ken o ya Trump tenüng nung pa indang okatsüri miima porn star Stormy Daniels nem 2016 presidential election atongtsü lia sen agütsüba indang lir.

Ken o balala nung tang arishi küm 76 tain Trump bushisüngdangba rongnung ibai ka lir, ajisüaka tang tashi pa anema ken o kata benoka mali aser pai aibelen masü ta nokdaker.

Pa anema ken o benokaka 2024 presidential election nung Republican nominee akumtsü atema maneni nübuyimtsü, ta Trump-i nangzüka lir.

Taoba mapang pa anema bushisüngdangtsü merangba rongnung anaben ken o benoktsü merangba, Russia nungeri bushisüngdangba aser Mar-a-Lago meita aoba ajanga pa tali nüngtugu akumba nung tarak ketja lir.

Tan hopta pa anema ken o benoktsü asü masüar ano tejangja mali. Ajisüaka taoba tiri pa aputsü takzütet aser nübur dang longkak aittsü ajungshi.

Trump sülen anidaker aika lir aser pai longkak aittsü ayongshiba sülen pa bukumer temi January 6, 2021 nü US Capitol amakba ajanga ano tensa tamajung mela-mela tenzüksü kuli sayur.

Honibarnü Trump-i pa indang social networking site Truth Social nung 'Manhattan district attorney indang office nungi ozüng alema temai adokba osang kar ajanga pa Mongulbarnü aputsü sayur,' ta shia liasü.

District attorney indang office ajanga tang tashi telangzüba kecha agüja mali. Trump okatsür Susan Necheles-ia lar teloki tang tashi law enforcement officials nungi kecha angashia mali, ta ashi.

"Ibai political prosecution ka asünung, district attorney indang office ajanga osangbener dang ajak temai adoktsüba yimya amshir aser danga ken o nung ama Trump indang attorney tem den mejembir," ta lai ashi.

US House of Representatives nung Republican Speaker Kevin McCarthy-i iba bushisüngdang aitsü aser ibai radical district attorney ajanga tashi tim masüba nung amshiba lir, ta ashi.

Stormy Daniels indang ken o ya Trump indang okatsür Michael Cohen-i la nem sen \$130,000 agütsür aliba menokba indang lir. Cohen nem iba sen agütsüba ya "legal fees" atema lir ta record nung shia lir.

2020 tir election mapang Georgia state nung pai tera agi tamakok ajuruba meyiptsütsü merangba atema Donald Trump anema ken o balaka benoka lir, saka taiba tir den i n d a n g - i n d a n g a bushisüngdangba mejangja.

Ano Trump-i office yutsüba sülen classified government document tem tim masüba yimya nung amshi asü masü aser küm asem tejakdang presidential election indang result tashi mait kumdahtsütsü merang asü masü ta Department of Justice-i reprangshimba mapang lir.

## Freddy yipru lendong nung asür nisung 500 dak tema jungogo



Cyclone Freddy ajanga kongshir aliba linük Chilobwe nung nübertem yipru agi raksatsüba tesem reprangtepa senzüba noksa ka angur.

iba linük nungi disaster management authorities-i Honibarnü ashiba agi, yipru lendong nung asür 438 jungogo. Malawi tir Lazarus Chakwera-i Brehostibarnü linük ajunga nung anogo 14 mang ayimba mapang alitsü ta sangdongogo.

Linük kübok tesem balala nung tekümzükertem atema tejenokdak balala amenoka lir. Malawi nung nisung aika ki maka kümogo aser nisung 345,000 shi tzünglu kanga sashia aruba, tzümetsüng aser anentsüh agi kongshir lir.

Iba yipru yagi southeast Africa dak kanga mejungi kongshiogo. Malawi den kidanger linük Mozambique aser Madagascar-a iba yipru yagi kongshiogo.

(Maneni tapak 8 nung...)

**Lilongwe, Metsüremi/ March 19 (Agencies):** Tropical Cyclone Freddy ajanga southeast Africa nung asür 522 jungogo, ta Malawi,

Mozambique aser Madagascar nungi ketdangsurtemi metetdaksü.

Iba yipru yagi Malawi dak tamajungtiba kongshiogo aser

## Putin-i Ukraine nung Mariupol yimti semdang

**Moscow, Metsüremi/March 19 (Agencies):** Russia Tir Vladimir Putin-i Donetsk region kübok Ukraine indang Mariupol yimti semdang, koba Moscow sepaitemi taoba küm May ita nungi amokbanga lir.

Putin ya helicopter nung Mariupol yimti-i ao aser iba yimti nung district kar semdanga tesem balala nung anener yangji alirtem den jembia liasü, ta TASS agency dang Kremlin-i Deobarnü ashi.

Russia-i Ukraine nungi Black Sea peninsula, Crimea rakzüker küm toku ajungba temaitsü Putin-i iba tesem semdang anogo ka lir Mariupol semdangba osang angazüker. Russian state TV nung pau Black Sea rongnendak Sevastopol yimti Honibarnü

semdangba sayuogo aser pa meina Moscow-i shimba governor Mikhail Razvozhayev oa liasü.

Referendum ka sülen Russia-i 2014 küm Crimea ya Ukraine nungi rakzüka liasü, saka iba referendum ya Kyiv mesüra alimai magizük.

Ukraine Tir Volodymyr Zelenskyy-i Russia dang iba tzümeketli aser taoba küm nungi parnoki amokbanga aruba tesemtem nungi ainshitsüla ta akhanger.

Ajidang masü International Criminal Court (ICC) ajanga pa aputsü totuyuba agütsüogo aser pai Ukraine nungi tila tanur noklang aika ozüng alema yokba asoshi war crime inyak ta tai tongloktsü, ta Hokulbarnü shir sülen Putin-i Mariupol ya

semdanger alitsü.

Pa aputsü totuyuba agütsüba atema Putin-i yimjak nung ola adoka mali. Kremlin odongtari iba totuyuba ya tazüngla lir, ta ashi aser ICC ajanga benokba ken o tem ya Russia-ibo kangasa talitapong mapa ka ama angateter aser magizükteter ta shia liasü.

Meindoker aliba Mariupol city council ajanga Putin-i iba yimti semdangba Deobarnü aija liasü.

"International criminal Putin-i amokbanga aliba Mariupol semdang. Pai iba yimti tanaben yangluba aonung reprang. Pai talenba nungi salatsüba mapang tepsetba yimti aonung mereprangnü," ta city council ajanga par Telegram account nung ashi.

## ARW Championships: Vikash &amp; Paramjeet na 2024 Olympics atema qualify süogo



Vikash Singh aser Paramjeet Singh Bisht

**Metsüremi/March 19, 2023 (Agencies):** India nunger 20km race walkers Vikash Singh aser Paramjeet Singh Bisht na Deobarnü Asian Championships asayaba mapang 2024 Paris Olympics aser 2023 World Championships atema qualify süogo.

Asian 20km Race Walking Championships tebur asaya open category nung Vikash aser Paramjeet na tanabuba aser tasembuba jenjang nung tembanga liasü. China nunger Qian Haifeng (1:19:09) sülen Vikash-i 1:20:05sec nung aser Paramjeet-i 1:20:08sec nung alizüing tongteta liasü.

2024 Paris Olympics aser August ita Budapest, Hungary nung asayatsü aliba 2023 World Athletics Championships atema qualifying mark ji 1:20:10 lir, koba India nunger asayar ana yagi tongtetogo

Akshdeep Singh bo taoba ita

National Championships akokba sülen 2024 Paris Olympics aser 2023 World Athletics Championships atema qualify süatoker liasü. Pai National Championships nung official entry category nung gold medal angu aser alizüing 1:20:57 nung tongtetaba sülen overall category nung pa pongububa nung tembanga liasü.

Tetoktepba temzüing ozüing kübok linük kati official entry dak alia open category temi asyartem yoktettsü, ajisüaka parnok ya exposure atema dang aser parnok asayaba yimya ya official ama magitsü.

Official entries (tebur ka tetsür ka) dak alia India-i iba asayamung nung shilem agitsü atema open category nung tebur pezü aser tetsür asem yoka liasü.

Open category nung India nunger asayar anaji Suraj

Panwar (1:22:31) aser Hardeep (1:25:38) na liasü.

Priyanka Goswami shibai taoba ita National Championships nung alizüing 1:32:27 nung tongteta women's official entry category nung bronze medal angu la 2024 Paris Olympics aser 2023 World Athletics Championships atema qualify süatoker liasü.

Ajisüaka India tsürtem rongnungi Munita Ptajapati (1:33:22) aser Bhawna Jat (1:36:20) nati atakzükja aliba mapang nung alizüing metongteta Olympics aser World Championships atema qualify mesütet.

Open category nung India tsürtem rongnung tasembula Sonal Sukhwal bo tetenzük nungi masaya.

2024 Olympics aser World Championships nung asayatsü atema India nunger asayar pezü qualify süogo.

## Indian Wells akokba asyartem rongnung Bopanna tambusang kümogo



**Metsüremi/March 19, 2023 (Agencies):** India nunger tennis asayar tejen Rohan Bopanna-i pa indang Australia nunger partner Matt Ebden den BNP Paribas Open tebur tarep asaya akokba sülen pa ATP Masters 1000 asayamung ka akokba asayar tambusang kümogo.

Arishi küm 43 tain Bopanna aser Ebden (35) nati Honibarnü final asaya nung top-seeded Netherlands nunger Wesley Koolhof aser Britain nung Neil Skupski na 6-3, 2-6, 10-8 agi koba liasü.

Iba final densema Bopanna-i ATP Masters 1000 final 10buba asayaogo.

"Ni kümtem tsüingdang idaki arua küm aika tanga asyartemi iba asayamung akoba nguogo. Matt künati iba asayamung koka idaki tite ngutetba atema kanga pelar," ta Bopanna-i ashi.

"Asayamung tepeyong asaya kar kanga toktepa asayaogo. Tanü künati idaki team tem rongnung tajungtiba ka den kanga junga asayaogo. Iba takok marok anguba atema kanga pelar," ta paisa ashi.

Asayamung akokba sülen Bopanna-i Canada nunger asayar Daniel Nestor ajateta ATP Masters 1000 asayamung ka akokba asayar tambusang kümogo. Nestor-i 2015 küm arishi küm 42buba nung

Cincinnati Masters koka asayar tambusang kümer liasü.

"Ni Danny Nestor den jembi aser ni pai yanglur aliba otsü tasen ajatetsü ta shir liasü," ta pai asayamenüa ashi.

Iba asayamung akokba ya Bopanna atema Masters 1000 doubles title pongububa aser 2017 küm Monte Carlo akokba sülen mezüngbuba asayamung akokba liasü. Tena taküm final asaya tasembuba tongteta asayaogo. Pai tang tashi nung tour-level takok marok 24 kokogo.

Bopanna aser Matt nati iba asayamung semifinal asaya nung defending and two-time desert titlists John Isner aser Jack Sock na tsükdaktsü aser quarter nunga Felix Auger-Aliassime aser Denis Shapovalov na tsükdakja liasü.

Bopanna aser Ebden nati mezüngbuba asaya nung Rafael Matos aser David Vega Hernandez na koka liasü.

Pepperstone ATP Live Doubles Rankings nung tang Bopanna jenjang pezü tejakdangi tua 11buba nung lir.

## Women's WBC: Nikhat Pre-quarters-i iogo

**New Delhi, Metsüremi/March 19 (Agencies):** Deobarnü India tsürtem rongnungi nungtugu boxer Nikhat Zareen-i Algeria tsür Boualam Roumaysa koka Women's World Championships pre-quarterfinal-i iogo.

50kg category nung Nikhat-i African championship tesüsabuba kokeralila ya 5-0 unanimous verdict agi koka iba asayamung nung tanabuba takok nguogo.

Asaya nung boxer anapronglai tetenzük nungbo takok tashi talang nungi dang asayatsü meranga liasü. Nikhat shibai iba asayamung tesüsabuba nung gold medal ngua lir lai tama Roumaysa dak kanga junga tsüngshia liasü. Iba sülen Algeria tsürla yagia Nikhat dak atsüing tenapronglai takok tashi points angutsü meranga asaya.

Asaya nung Nikhat ishíben tsüingra Roumaysa-ia meyiper India tsürlai la temang junga menokdangi asayaba maongka agia la dak ya tsüngokja liasü.

Ajisüaka mezüngbuba round ya Nikhat-i akok aser tanabuba round nungbo lai tetenzük nungi jenshia mesenzüi takok tashi points angutsü meranga asaya. Kasa mapang nung Roumaysa-a attack süa asayatsü atema renemshir ait.

Boxer anapronglai tejakdangi arua takokba tashi points angutsü meranga asaya, saka tatem nung Nikhat-i takok ngua liasü.

"Tanü ni takok tashi round ajak amokbanger asayatsü sentong liasü, kechiyong la top seed asayar lir. Seeding nung maongka keta lir. Nia iba asayamung nung seeded asayar lir. Ni top seed asayar kokra iba ajanga tetendangertem atsüa arur," ta Nikhat-i asaya tembangba sülen ashi.

"Ni taoba mapang la asayaba nguogo. La den chiteper asayara la kanga aggressive akümer. Anungji ni takok tashi la dang nungi pilar asayatsü merang, ajisüaka asaya kangabo mereka masayatet," ta lai shisem.

## Freddy yipru lendong... (Tapak 7nungi...)

Mozambique nung nisung aser March 11 nü ano 67 süogo ta tir Filipe Nyusi-i Mozambique-i tanaben meyipa aru aser Malawi leni ao.

Yipru agi mekongshi tsüingda linük anaprongla cholera tashidak pokteter kanga timtemtepa liasü aser tzümetsüing aruba ajanga tzü ajanga menatepba iba tashidak ya tamajungba akümstü ta tsübua bilemer. Kasa mapang nung Freddy yipru agi mezüng kongshiba aser taküm küm tetenzüklen tzümetsüing agi kongshiba agi Mozambique bo kangshia aliba mapang nung iba yipru yagi tanaben kongshio.

Scientist temi ashiba agi mimchirtem inyakyim ajanga tzümopung melenshidaktsüba ajanga yipru lendong tamajungba kümdaktsüogo.

Freddy yipru yagi February ita tatemlen Mozambique, Madagascar aser Réunion dak kongshiba sülen southern Africa kanga mejungi raksatsüogo. Iba sülen yipru ya Mozambique Channel nung tashi taitba kümshia ano tanaben meyipa arur timtem tulu agütsüogo.

Southern Africa nung tang ya yipru lendong kanga bulua adokba mapang ka lir aser iba ajanga March mesüra April tashi tzüinglu aser mopung tesashi bener arutsütsü akok.

Freddy yipru yagi February 21 nü mezüngbuba Madagascar dak kongshi. Iba sülen yipru ya Mozambique leni ao aser Indian Ocean leni ao

**BILEMDANGANG**

**"Konang nüngsang rongsen ajak alima sobutsü dang."**